



Broj: 02-04-38/25-AP-3
Datum: 10.02.2025. godine

GRADSKO VIJEĆE ZAVIDOVIĆI
n/r PREDSEDAVAJUĆOJ GRADSKOG VIJEĆA
Hadžić dr Amira, spec. radiolog

PREDMET: Odgovori na vijećnička pitanja sa 2. sjednice Gradskog
vijeća Zavidovići održane 26.12.2024. godine, dostavljaju se

Povodom vijećničkih pitanja postavljenih na 2. sjednice Gradskog vijeća Zavidovići održanoj 26.12.2024. godine, dostavljamo odgovore na iste kako slijedi:

1. VIJEĆNIČKA PITANJA VIJEĆNIKA ŠEMUSUDINA SKEJIĆA

Vijećnik Šemsudin Skejić: Želim da pozdravim sve prisutne i medije koje nas prate. Razmišljajući šta bi bilo najpotrebnije u startu ovog mandata, odnosno šta ja želim da uradim u ovom mandatu, ja sam se odlučio za jedno vijećničko pitanje koje će nadam se poručiti neke rezultate u smislu da se nešto od toga ostvari. Mnogi koji su ovdje bili u protekle četiri godine, vjerovatno znaju šta ću ja ponuditi. Postavit ću nekoliko pitanja sa ciljem da se otvori do kraja pitanje i riješi pitanje vodosnadbijevanje prostorne cijeline Pašin konak. Puno je priče bilo u protekle četiri godine, na nekoliko sjednica vođena je rasprava, donošeni su zaključci, sve možemo govoriti u množini, čak je bilo dogovoreno i da se podigne kredit. Ja ću konkretno pročitati moja tri ili četiri pitanja koja će pomoći da dobijemo cjelovitu informaciju o tom projektu.

Na osnovu člana 8 i 87. Poslovnika o radu Gradskog vijeća postavljam vijećničko pitanje koje se odnosi na realizaciju projekta snadbijevanja Prostorne cijeline Pašin Konak.

1. Koliko je sredstava do 31.12. uloženo u realizaciju projekt i koje faze projekta su do kraja 2024. godine završene i u kom procentu?
2. Koliko sredstava je potrebno uložiti u preostale radove i koje radove treba izvesti da bi započeti projekat bio realizovan u planiranom obimu?
3. Molim da nadležna služba sačini Dinamički plan završetka započetog projekta i da se isti dostavi Gradskom vijeću.
4. Također, molim u Gradonačelnicu da cjelovitu informaciju o realizaciji projekta Vodosnadbijevanja prostorne cijeline Pašin Konak pripremi i prosljedi Gradskom vijeću na raspravu koja bi se održala na martovskoj sjednici.

OBRAZLOŽENJE

Dugo, rekao bih predugo traje realizacija, vjerovatno u ovom trenutku najobimnijeg infrastrukturnog projekta Grada Zavidovići. Podsjećam da je prije 7 godina izdata graševinska

dozvola za prvu fazu gradnje. Krajnje vrijeme je da odlučimo kakav status ćemo dati ovom projektu. Siguran sam da je projekat moguće realizovati do ljeta 2026. godine. Zato obezbijedimo cjelovitu informaciju koju ćemo analizirati na sjednici Gradskog vijeća u martu 2025. godine i donesimo odluku kakva god ona bila. Pri tom moramo voditi računa da je u realizaciji i sličan po obimu projekat Vodosnadbijevanja prostorne cijeline Rujnica. Ako se prema ovim projektima budemo odnosili kao ddo sada nećemo ih završiti za više od 10 godina, a tada nam možda neće trebati. Neću moći prihvatiti odgovor da se traženi podaci ne mogu obezbijediti.

Odgovor na prvo vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-30/25 od 15.01.2025. godine): Projekat vodosnadbijevanja prostorne cijeline Pašin Konak sačinjen je u fazama za svaki od sedam rezervoara i za iste su izdate dozvole za građenje kako slijedi: rezervoar R-1 07.03.2018. godine, rezervoar R-2 07.03.2018. godine, rezervoar R-3 24.02.2022. godine, rezervoar R-4 14.12.2020. godine, rezervoar R-5 14.12.2020. godine, rezervoar R-6 15.05.2020. godine i rezervoar R-7 15.05.2020. godine. Zbirna projektantska vrijednost investicije za svih sedam rezervoara iznosi 1.888.407,04 KM sa uračunatim PDV-om.

Za projekat distributivne mreže dozvola za građenje je ishodovana 26.02.2024. godine.

Početak realizacije investicije je 2020. godine, kada je izgrađen rezervoar R2/PS2 zapremine $V=100\text{m}^3$ i zatvaračka komora u kojoj su smješteni hidroinstalacije i komplet oprema za pumpnu stanicu PS2. Realizovana vrijednost radova je iznosila 209.758,17 KM, a sredstva su obezbijedena od Ministarstva za poljoprivredu, šumarstvo i vodoprivredu ZDK iz Programa utroška sredstava vodnih naknada za 2019. godinu u iznosu 174.927,27 KM i Budžeta Grada Zavidovići u iznosu 34.830,90 KM. Radovi su izvođeni u 2020. i 2021. godini od strane preduzeća GP „HELDOVAC“ d.o.o. Žepče.

Takođe u toku 2020. godine izvršena je izgradnja rezervoara R1/PS1 sa dvije rezervoarske komore $V=2 \times 100\text{ m}^3$. Realizovana vrijednost radova je iznosila 172.712,98 KM, a sredstva su obezbijedena od Ministarstva za poljoprivredu, šumarstvo i vodoprivredu ZDK iz Programa utroška sredstava vodnih naknada za 2019. godinu u iznosu od 159.858,02 KM i Budžeta Grada Zavidovići u iznosu od 12.816,45 KM. Radovi su izvođeni u 2020. godini od strane preduzeća „Porobić“ d.o.o. Zavidovići.

U toku 2021. godine pokrenuta je izgradnja rezervoara $V=50\text{ m}^3$ sa pumpnom stanicom – R4/PS3 i dovršetak elektro i montažnih radova na rezervoaru $V=2 \times 100\text{ m}^3$ sa postojećom pumpnom stanicom - R1/PS1. Realizovana vrijednost radova je iznosila 201.649,50 KM, a sredstva su obezbijedena od Ministarstva za poljoprivredu, šumarstvo i vodoprivredu ZDK iz Programa utroška sredstava vodnih naknada za 2020. godinu. Radovi su izvođeni u 2021. i 2022. godini od strane preduzeća GP „Heldovac“ d.o.o. Žepče.

U toku 2022. godine ugovorena je izgradnja rezervoara R5 $V=2 \times 100\text{ m}^3$, tj. dvije zasebne komore po $V=100\text{ m}^3$, kao i zasebna zatvaračka komora. Ugovorena vrijednost radova je 119.295,50 KM, a isti se finansiraju iz sredstava Federalnog ministarstva finansija sa pozicije „Kapitalni transferi drugim nivoima vlasti i fondovima – KANTONI I OPĆINE“ - Sufinansiranje od strane Vlade F BiH Odlukom o raspodjeli sredstava utvrđenih budžetom Federacije BiH za 2021. godinu.

Takođe, u toku 2022. godine ugovoreni su radovi na dovršetku radova na rezervoaru R5, dovršetku mašinskih i hidroinstalacija u postojećoj pumpnoj stanici PS 1 i izgradnji dijela

potisnog cjevovoda R1-R2 u dužini od 210 metara. Ugovorena vrijednost radova iznosila je 162.793,48 KM. Sredstva su obezbijeđena od Ministarstva za poljoprivredu, šumarstvo i vodoprivredu ZDK iz Programa utroška sredstava vodnih naknada za 2021. godinu u iznosu od 100.000,00 KM i Budžeta Grada Zavidovići u iznosu od 62.793,48 KM.

Radove za oba ugovora koji se odnose na izgradnju rezervoara R5 izvodilo je preduzeće „POROBIĆ“ d.o.o. Zavidovići. Početak radova na izgradnji rezervoara R5 su kasnili zbog rješavanja problema pristupnog puta za koji je bilo neophodno provesti poseban postupak javne nabavke. Radovi su okončani u 2023. godini.

U toku 2023. godine ugovoreni su i radovi na izgradnji rezervoara R3 - V=100 m³ u iznosu od 104.284,79 KM. Sredstva su obezbijeđena od Ministarstva za poljoprivredu, šumarstvo i vodoprivredu ZDK iz Programa utroška sredstava vodnih naknada za 2022. godinu u iznosu od 65.000,00 KM i Budžeta Grada Zavidovići u iznosu od 39.284,75 KM. Izvođač radova bilo je preduzeće GP „HELDOVAC“ d.o.o. Žepče. Radovi su okončani u 2023. godini.

U 2023. godini ugovoreni su radovi na izgradnji rezervoara V= 50 m³ sa pumpnom stanicom R6/PS4 u iznosu od 105.300,00 KM. Sredstva su obezbijeđena od Ministarstva za poljoprivredu, šumarstvo i vodoprivredu ZDK iz Programa utroška sredstava vodnih naknada za 2023. godinu. Izvođač radova je bio preduzeće „DŽEVKOMERC INŽENJERING“ d.o.o. Zavidovići. Radovi su okončani u 2024. godini.

Takođe, u 2023. godini ugovoreni su radovi na izgradnji rezervoara V= 50 m³ R7 u iznosu od 97.110,00 KM. Sredstva su obezbijeđena od Ministarstva za poljoprivredu, šumarstvo i vodoprivredu ZDK iz Programa utroška sredstava vodnih naknada za 2023. godinu u iznosu od 91.482,00 KM i Budžeta Grada Zavidovići u iznosu od 5.628,00 KM. Radove izvodi preduzeće „DŽEVKOMERC INŽENJERING“ d.o.o. Zavidovići, a početak istih je bio prolongiran do 05.10.2024. godine radi ishodovanja sertifikata o deminiranju pristupnog puta. Radovi su izvršeni cca. 94%, a okončanje istih će biti sticanjem povoljnih vremenskih uslova.

Okončanjem radova na rezervoru R7 završava se izgradnja rezervoara i pumpnih stanica, te dalje slijede radovi na izgradnji potisnih vodova odnosno spajanja rezervoara.

U 2024. godine ugovoreni su radovi na izgradnju 1.245 metara potisnog cjevovoda između rezervoara R1/PS1 – R2/PS (V1) u iznosu od 179.314,20 KM. Sredstva su obezbijeđena od Federalnog ministarstva finansija sa pozicije „Kapitalni transferi drugim nivoima vlasti i fondovima – KANTONI I OPĆINE“ - Sufinansiranje od strane Vlade FBiH Odlukom o raspodjeli sredstava utvrđenih budžetom Federacije BiH za 2023. godinu u iznosu od 100.000,00 KM i Budžeta Grada Zavidovići u iznosu od 79.314,20 KM. Izvođač radova je bio preduzeće GP „HELDOVAC“ d.o.o. Žepče. Radovi su okončani u 2024. godini.

Krajem 2024. godine ugovoreni su radovi na izgradnji 1.285 metara potisnog cjevovoda rezervoar R2/PS2 - R3 (V2) i dio voda R3 – R4/PS3 (V3) u dužini 1.300 metara u iznosu od 239.597,76 KM. Sredstva su obezbijeđena putem Ministarstva za poljoprivredu, šumarstvo i vodoprivredu ZDK iz Programa utroška sredstava vodnih naknada za 2024. godinu u iznosu od 212.627,41 KM i Budžeta Grada Zavidovići u iznosu od 26.970,35 KM. Radovi će se izvoditi početkom 2025. godine sticanjem povoljnih vremenskih uslova.

Od početka realizacije projekta vodosnabdijevanja prostorne cjeline Pašin Konak izvedeno je radova u vrijednosti 1.352.218,62 KM, dok je u fazi izvođenja ili je ugovoreno 239.597,76 KM vrijednosti radova, što ukupno čini iznos od 1.591.816,38 KM.

Takođe, Grad Zavidovići ima obezbijeden iznos od 200.000,00 KM od Federalnog ministarstva finansija sa pozicije „Kapitalni transferi drugim nivoima vlasti i fondovima – KANTONI I OPĆINE“ - Sufinansiranje od strane Vlade FBiH Odlukom o raspodjeli sredstava utvrđenih budžetom Federacije BiH za 2024. godinu. Navedenim sredstvima i uz dodatna sredstva Grada Zavidovići, po usvajanju Budžeta Grada Zavidovići za 2025. godinu raspisat će se javna nabavka za izgradnju preostalog dijela voda R3 – R4/PS3 (V3) u dužini 2.200 metara i rasteretnih komora RK1 i RK2 procijenjene vrijednosti 249.372,00 KM.

Navedena sredstva se nisu realizovala u toku 2024. godine jer je bilo neophodno izvršiti izmjene projektne dokumentacije kako bi se pribavila dozvola za građenje rasteretnih komora. Naime jedna od rasteretnih komora se nalazila na šumskom zemljištu, koje se smatra državnom imovinom te na istom nije bilo moguće riješiti imovinsko-pravne odnose.

Odgovor na drugo vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-30/25 od 15.01.2025. godine): Za okončanje izgradnje ostatka potisnih cjevovoda R4/PS3-R5 (V4) dužine 1.110 m1; R5-R6/PS4 (V5) 3.710 m1 i R6/PS4-R7 (V6) 880 m1 u narednom periodu neophodno je obezbijediti oko 500.000,00 KM ne uzimajući u obzir očekivanu inflaciju u toku 2025. godine.

Odgovor na treće vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-30/25 od 15.01.2025. godine): U toku 2025. godine planira se dovoz vode do rezervoara R5 u naseljenom mjestu Rudače. Spajanje svih 7 rezervoara sa primarnim vodom, sadašnjom dinamikom finansiranja planirano je u toku 2026. godine, a dalja dinamika izgradnje sekundarnih vodovoda zavisit će od dinamike izrade projekata sekundarnog vodovoda, rješavanja imovinsko-pravnih odnosa i pribavljanja odobrenja za građenje.

2. VIJEĆNIČKO PITANJE VIJEĆNICE ELVIRE DELIĆ

Vijećnica Elvira Delić: Ja vas sve srdačno pozdravljam, pozdravljam stanovnike naše Opštine, također iskoristit ću priliku da pripadnicima katoličke vjeroispovijesti čestitam Božić. Sada ću samo pročitati ovo pitanje, nadam se da ću ja to uspjeti.

Na osnovu člana 8 i 87 Poslovnika o radu Gradskog vijeća Zavidovići, kao vijećnik Gradskog vijeća Zavidovići, tražim od nadležne Gradske službe da nam dostavi informaciju kada će nadležna Gradska služba i Gradska uprava izdati građevinsku dozvolu za putnu komunikaciju Trn-Ilići-Šabin potok za koju je prethodno Gradsko vijeće Zavidovići izglasalo javni interes. Mještani Mjesne zajednice Rujnica su u prethodnim godinama uložili 361. 000,00 KM na ime izgradnje putne komunikacije Trn-Ilići-Šabin potok uz dodatnih 800 dnevnica radne snage. Grad Zavidovići je uzeo učešće u iznosu od 211. 000 KM, te ZE-DO kanton sa iznosom od 50. 000,00 KM. Preko 700.000,00 KM uloženo je u ovu putnu komunikaciju koja zimi nije prohodna jer nema obezbijedeno zimsko održavanje, te još uvijek nije ni uvrštena u plan zimskog održavanja jer Gradske službe nisu završile aktivnosti na cijepanju parcela, eksproprijaciji i izdavanju građevinske dozvole.

Direkto pitanje: Zašto se stalo sa aktivnostima na izdavanju potrebnih dozvola za legalizaciju putne komunikacije Trn-Ilići-Šabin potok, kada se može očekivati završetak poslova na cijepanju parcela, eksproprijacije novoformiranih parcela i izdavanju građevinske dozvole, te postavljanja saobraćajnih znakova ograničenja brzine i nosivosti?

Također tražimo informaciju: da li Gradsko vijeće kao predstavnički organ može ovu putnu komunikaciju uvrstiti u zimsko održavanje puteva na području Grada Zavidovići bez dase čeka legalizacija izdavanja građevinske dozvole?

Od nadležnih zahtijevam jasne odgovore u pisanoj formi. Vijećničko pitanje upućuje se nadležnoj Gradskoj službi.

Odgovor na vijećničko pitanje (Odgovor je sačinjen na osnovu akta Službe za upravu geodetskih, imovinskopravnih poslova i urbanizam, broj: 06-45-19/25-AP-8 od 15.01.2025. godine): Služba za upravu geodetskih, imovinskopravnih poslova i urbanizma kao nadležna služba za izdavanje odobrenja za građenje („građevinska dozvola“) će izdati predmetno rješenje najkasnije u roku od 10 dana od dana dostavljanja kompletnog zahtjeva kako zakon i nalaže.

U konkretnom slučaju, ova Služba kao nadležna služba je izdala urbanističku saglasnost broj: 06/20-19-3358/20-UP-1-2 dana 08.10.2020. godine. Nakon izdavanja urbanističke saglasnosti nikad nije podnesen zahtjev za izdavanje odobrenja za građenje („građevinska dozvola“) jer nisu riješeni imovinskopravni odnosi na trasi puta. Navedena urbanistička saglasnost je izmijenjena donošenjem rješenja, broj: 06/20-19-2780/21-UP-1-2 dana 08.09.2021. godine gdje se daju uslovi za izdavanje odobrenja za građenje za armirano-betonski potporni zid kako bi se zaštitio put i osigurao okolni mikrolokalitet.

Međutim, prilikom podnošenja zahtjeva i razmatranja dostavljene projektne dokumentacije od 26.08.2024. godine, utvrđeno je da se moraju dati uslovi za izdavanje odobrenja za građenje za armirano-betonski potporni zid i ab-propust uz trup lokalne ceste Trn – Ilići - Šabin pa je doneseno novo rješenje, broj 06/20-19-3397/24-UP-1-2 dana 03.10.2024. godine gdje se daju uslovi za izdavanje odobrenja za građenje za armirano-betonski potporni zid i ab-propust uz trup lokalne ceste Trn – Ilići - Šabin potok.

Imajući u vidu navedeno, trenutno će se moći samo postupati po novom zahtjevu za izdavanje odobrenja za građenje za armirano-betonski potporni zid i ab-propust uz trup lokalne ceste Trn – Ilići - Šabin potok jer se u tom dijelu može odobriti građenje. Izdavanje odobrenja za cijelu trasu puta u dužini od I=2544,33 metra će potrajati duže jer se trasa radi na 78 parcela i način rješavanja imovinskopravnih odnosa na parcelama koje nisu upisane u zemljišnu knjigu iziskivat će i neka prelazna rješenja, a sve s ciljem završetka ovog puta.

Molimo da ubuduće, prije nego što se postave vijećnička pitanja, kontaktirate sa ovlaštenim predstavnicima mjesnih zajednica i službom koja priprema zahtjeva za obradu, jer u svim predmetima u kojima je podnosilac zahtjeva Grad Zavidovići ova služba konstantno poziva predstavnike i traži najbolji i najbrži način da se zahtjevi upotpune i da se po istim, u zakonskim okvirima, mogu donijeti rješenja.

3. VIJEĆNIČKA PITANJA VIJEĆNICE AMRE JUPIĆ

1. Vijećnica Amra Jupić: Pozdravljam sve prisutne u Gradskom vijeću Zavidovići, a posebno pozdravljam naše uvažene sugrađane koji nas slušaju putem Radio 1503, željela bih kao kolegica Delić maločas da se pridružim čestitkama našim sugrađanima, pripadnicima rimokatoličke vjere, da ove blagdane obilježe u krugu svojih najmilijih,.. u obilju nafake i da naredne blagdane dočekaju zadovoljni, sretni i u dobrim odnosima sa svojim komšijama. Ja imam 17 pitanja pa ću ih fino... vašeg vremena rasporediti, ne morate negodovati odmah. Rasporedit ću ih na narednih 2-3 sjednice, a danas ću po prioritetu kako zaslužuju mada su sva pitanja naša, nema trivijalnih pitanja. Sva naša pitanja su jako obimna za naše građane, zato smo tu. Ja ću samo taksativno o čemu se radi. A naša gospođa Pinjić sekretar vijeća će dobiti u pisanoj formi zato što i štedim vaše vrijeme i ne želim da me iko od Predsjedništva upozorava da mi je vrijeme isteklo.

1. Nadležnim službama

Od strane pomoćnika Gradonačelnika Izeta Bašića kreiran je Program poljoprivrednih poticaja za 2024. godinu u iznosu od 96.000,00 KM. Obzirom na činjenicu da je kraj godine, interesuje nas da li je Javni poziv poljoprivrednim proizvođačima okončan te da li je izvršena kontrola ispunjenosti uslova i da li su isplaćena sredstva našim proizvođačima. Dakle, tražimo da nam se dostavi Plan poljoprivrednih poticaja, Javni poziv, te spisak svih aplikacija koji su se javili na Javni poziv sa obrazloženjem da li su ispunjavali uslove ili ne, dakle SVIH APLIKANATA. Također, ukoliko je sve okončano, tražimo da se dostave spiskovi sa ukupnim iznosom sredstava, pojedinačno kome je sve isplaćeno. Odgovor tražimo u pisanoj formi.

Odgovor na prvo vijećničko pitanje (Odgovor je sačinjen na osnovu akta Službe za upravu poljoprivrede, vodoprivrede i komunalnih poslova, broj: 08-45-23-24/25 od 24.01.2025. godine): Služba za upravu poljoprivrede, vodoprivrede i komunalnih poslova je instrukcijom broj 2 u augustu 2023. godine tražila da se za 2024. godinu na Tekućem transferu za razvoj poljoprivrede obezbijedi 300.000,00 KM. U prijedloga Budžeta za 2024. godinu predloženo je da taj iznos bude 200.000,00 KM, dok je na kraju usvojen iznos od svega 96.196,00 KM.

Dana 19.03.2024. godine pripremljen je Program utroška sredstava sa „Transfera za razvoj poljoprivrede“ planiranog u Budžetu Grada Zavidovići za 2024. godinu, kao i predmetni javni poziv. Gradonačelnik je tražio da se predmetni program i javni poziv ne objavljuju zbog umanjenja sredstava na predmetnom transferu. Tako je i bilo pa je predmetni transfer u junu 2024. godine umanjen za 88.000,00 KM, tako da je na transferu ostalo svega 8.196,00 KM.

Gradonačelnik je tražio da se sačini program za utrošak raspoloživih 8.196,00 KM sa naznakom da se isplate sredstva za uginuća stoke, štete u poljoprivredi i isplata sredstava zbog nastalih administrativnih grešaka nastalih 2023. godine. Takav program gradonačelnik je i usvojio i na osnovu istog programa isplaćena su sredstva u skladu sa programom.

Rješenjem broj: 02-11-1895/24 od 24.09.2024. godine došlo je ponovo do preraspodjele sredstava u budžetu pa je na predmetni transfer za razvoj poljoprivrede vraćeno 88.000,00 KM, pod uticajem grupe poljoprivrednika koji su održali sastanak sa gradonačelnikom i pomoćnikom gradonačelnika. Gradonačelnik je dao smjernice za utrošak sredstava za poljoprivrednike i nakon toga je i usvojio program odnosno javni poziv za utrošak tada raspoloživih 88.000,00 KM. Po objavi javnog poziva na isti je prijavljeno 362 lica. Formirana je komisija koja je obradila zahtjeve i izvršila uviđaje na terenu. Dana 19.12.2024. godine donesene su preliminarne liste za poljoprivrednike koji su ispunili uslove za podsticaje i za one koji nisu ispunili uslove za podsticaje. Na preliminarne liste bilo je devet pisanih prigovora. Donesena su rješenja po prigovorima, sačinjene su i konačne liste za podsticaj i zaključak o isplati sredstava. Riješena je isplata za sva lica sa konačne liste dana 23.01.2025. godine.

U prilogu Vam dostavljamo izvode akata koji su traženi: Program od 19.03.2024. godine, javni poziv od 20.04.2024. godine, program od 15.08.2024. godine, devet zaključaka o isplati od 23.08.2024. godine, program i javni poziv od 27.09.2024. godine, preliminarnu listu od 19.12.2024. godine sa spiskom od 313 lica koja su ostvarila podsticaje i preliminarnu listu od 49 lica koja nisu ostvarila podsticaje, kao i konačne liste od 20.01.2025. godine sa spiskovima.

2. Vijećnica Amra Jupić: 2. Nadležnim službama

Prilikom predlaganja i usvajanja Budžeta za 2024. god. nisu bile planirane novogodišnje aktivnosti i događaji. Obzirom na činjenicu da se domaćinski pristupalo budžetu i sredstva su se trošila shodno planu i programu. Interesuje nas na osnovu čega je planirano i koliko će koštati manifestacija "Ledena čarolija" koja je planirana ispred i u JU „Kulturno-sportski centar" Zavidovići, kao što je ranije bilo organizirano ispred Gimnazije. U Pisanom

obliku tražimo odgovor, da li su sredstva za ovu manifestaciju planirana Budžetom za 2024. godinu i na kojoj stavci u dokumentu?

Odgovor na drugo vijećničko pitanje (Odgovor je sačinjen od strane Stručne službe gradonačelnika): Sredstva za organizaciju manifestacije „Ledena čarolija Zavidovići 2024“, koja je priređena povodom praznika Nova godina, su korištena sa izdataka namijenjenih za plaćanje izdataka obilježavanje državnih praznika i Dana Grada Zavidovići, a koja su planirana Budžetom Grada Zavidovići za 2024. godinu na kontu 61399164. Praznik Nova godina je propisan kao međunarodni praznik koji se slavi u Federaciji Bosne i Hercegovine u skladu sa Zakonom o praznicima („Službeni list RBiH“, broj: 2/92) koji je preuzet i koji se u skladu sa Ustavom Federacije Bosne i Hercegovine primjenjuje kao federalni propis. Ukupan iznos utrošen za organizaciju manifestacije „Ledana čarolija Zavidovići 2024“ iznosi 7.474,00 KM, koji je obuhvatio iznajmljivanje klizališta, sajamskih kućica, nastupa lokalnog orkestra, kao i troškove organizacije programa koji se provodio unutar objekta JU „Kulturno-sportski centar“ Zavidovići.

3. Vijećnica Amra Jupić: 3. Nadležnim službama

Da li se u skorijoj budućnosti planira sanacija podvožnjaka u MZ Dolina-Alići i da li se kroz planiranje u Budžetu za 2025.god. mogu osigurati sredstva za pomenutu sanaciju. Jedan od najbitnijih razloga je nepristupačnost vatrogasnom vozilu u slučaju požara, čime bi život mještana MZ Dolina-Alići i njihova imovina bili ugroženi. Odgovor tražim u pisanoj formi.

Odgovor na treće vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-30/25 od 15.01.2025. godine): Objekat podvožnjak u MZ „Dolina – Alići“ je u vlasništvu JP Željeznice Federacije BiH, te Grad Zavidovići ne može vršiti građevinske intervencije na samom objektu. U narednom periodu, u skladu sa budžetskim mogućnostima, Grad Zavidovići će nastojati obezbijediti alternativni putni pravac iz pravca Čumurane kako bi za mještane koji žive iznad podvožnjaka bio obezbijeđen pristup vatrogasnog vozila kao i drugih teških vozila.

4. Vijećnica Amra Jupić: 4. Nadležnim službama

Tražim da mi se dostavi stanje i opremljenost Vatrogasne jedinice Zavidovići. Odgovor tražim u pisanoj formi.

Odgovor na četvrto vijećničko pitanje (Odgovor je sačinjen na osnovu akta Službe za upravu civilne zaštite, broj: 07-45-21-37/25 od 03.02.2025. godine): Programom rada Gradskog vijeća za 2025. godinu, kao jednu od redovnih tački sjednica Gradskog vijeća koja će se naći na dnevnom redu u martu mjesecu 2025. godine, Služba za upravu civilne zaštite Zavidovići podnosi „Izvještaj o stanju i opremljenosti profesionalne vatrogasne jedinice Grada Zavidovići“ u kojem su detaljno sadržane sve informacije po ovom vijećničkom pitanju. Sam izvještaj je gotov i u skladu sa procedurom bit će u martu ove godine na dnevnom redu sjednice Gradskog vijeća.

4. VIJEĆNIČKO PITANJE VIJEĆNIKA AMIRA TURSIĆA

Vijećnik Amir Tursić: E-selamu-Alejkum, dobro veče cijenjene kolege vijećnici, Gradonačelnice sa saradnicima, predstavnici medija i sugrađani.

Pitanje je vrlo aktuelno, odnosi se na zimsko održavanje. Određeni broj građana iznosi primjedbe na čišćenje, bolje reći nečišćenje snijega na pojedinim površinama, uglavnom na

nekategorisanim putevima, ima tu i drugih površina kao što su određeni dijelovi gradskog urbanog područja koji nisu obuhvaćeni čišćenjem. Zanima me ko je prilikom ugovaranja, odnosno pripremi tenderske dokumentacije, odredio koje će pravci, ulice i površine ući u program zimskog održavanja, a koji ne?

Također, zanima me ko je odgovoran za čišćenje snijega na površinama koje nisu obuhvaćene ugovorom o zimskom održavanju? Molim odgovor u pisanoj formi.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-30/25 od 15.01.2025. godine): Čišćenje i razgrtanje snijega i leda sa javnih gradskih površina i lokalnih puteva i posipanje abrazivnim materijalom ulica i lokalnih puteva spada u komunalne djelatnosti zajedničke komunalne potrošnje u smislu Zakona o komunalnim djelatnostima Zeničko-dobojskog kantona te iz istog proizilazi i zakonska obaveza zimskog održavanja javnih površina, ulica i lokalnih cesta. Odlukom o utvrđivanju naziva ulica, trgova, mostova i drugih građevina („Službeni glasnik Općine Zavidovići“, broj: 4/2008) definisani su nazivi ulica, trgova i mostova, definisane su njihove granice i dužine i iste su obuhvaćene zimskim održavanjem.

Takođe, lokalne ceste koje su definisane članom 8. Zakona o cestama Federacije Bosne i Hercegovine obuhvaćene su zimskim održavanjem.

Grad Zavidovići vrši čišćenje i nekih nerazvrstanih cesta za koje je u ranijem periodu utvrđeno da su od značaja za gradski saobraćaj.

Ukupna dužina gradskih ulica na kojima se vrši zimsko održavanje je 41,52 km a prosječna cijena kilometra po sezoni iznosi 2.442,33 KM sa PDV-om. Ukupna dužina lokalnih cesta na kojima se vrši zimsko održavanje je 94,12 km a prosječna cijena kilometra po sezoni iznosi 1.945,70 KM sa PDV-om što predstavlja budžetski izdatak od 284.535,20 KM. Ako na to dodamo iznos od 31.941,00 KM za zimsko održavanje javnih površina i stepeništa ukupan iznos zimskog održavanja predstavlja budžetski izdatak od 316.476,20 KM.

Grad Zavidovići raspolaže i mrežom nerazvrstanih cesta cca. 102 putna pravca ukupne dužine 172 km, a koje nisu obuhvaćene zimskim održavanjem iz finansijskih razloga. Čišćenje nekih od prioritarnijih nerazvrstanih cesta vrši se ad hoc u organizaciji Savjeta mjesnih zajednica sredstvima istih ili uz pomoć Civilne zaštite kao što je u ovoj godini bio slučaj, a što na godišnjem nivou iznosi između 10.000,00 i 15.000,00 KM.

Takođe, neke od nerazvrstanih cesta čiste mještani samoorganizovanjem.

Dakle, zimsko održavanje nerazvrstanih cesta je u nadležnosti Grada, ali isto nije zakonska obaveza i ovisi o raspoloživim finansijskim sredstvima.

5. VIJEĆNIČKO PITANJE VIJEĆNIKA ASIMA DŽINDE

Vijećnik Asim Džindo: Uvažene Gradonačelnice sa saradnicima, poštovane Vijećnice i Vijećnici, sugrađani koji nas slušate, ali nažalost i ne vidite, sve vas srdačno pozdravljam i upućujem iskrene čestitke za predstojeće novogodišnje praznike. Imam jedni vijećničko pitanje i 1 inicijativa.

Na osnovu člana 8. i 87 Poslovnika o radu Gradskog vijeća Zavidovići, kao Vijećnik Gradskog vijeća Zavidovići postavljam slijedeće vijećničko pitanje:

Tražim od nadležne Gradske službe da nam dostavi informaciju i podatke o isplaćenim sredstvima svim udruženjima i klubovima koji su u prethodnoj 2023. godini organizovali

sportske manifestacije an području Grada Zavidovići, uz informaciju zašto tekuće 2024. godine nije objavljen Javni poziv za sufinansiranje sportskih manifestacija koje organizuju sportski klubovi sa područja lokalne samouprave? Od nadležnih zahtijevam jasne odgovore u pisanoj formi. Vijećničko pitanje upućuje se nadležnoj Gradskoj službi.

Odgovor na vijećničko pitanje (Odgovor je sačinjen na osnovu akta Službe za upravljanje društvenih djelatnosti, pitanja boraca i opću upravu, broj: 04-45-18/25-AP-12 od 22.01.2025. godine): Grad Zavidovići je u 2023. godini putem javnog poziva dodjelio sredstva sa tekućeg transfera za fizičku kulturu i sport u koja pored redovnog rada i aktivnosti klubova spadaju i sredstva za različite planirane sportske manifestacije.

Dodijeljena sredstva Tekućeg transfera za fizičku kulturu i sport bila su istaknuta na Oglasnoj ploči kao i na web stranici Grada Zavidovići, a pojedinačna dodijeljena sredstva sportskim klubovima mogla su se također pogledati u Izvještaju o izvršenju Budžeta Grada Zavidovići za 2023. godinu koji je također javan i može se preuzeti sa web stranice Grada Zavidovići.

Sa Tekućeg transfera za fizičku kulturu i sport putem javnog poziva u 2023. godini dodijeljena su sljedeća sredstva klubovima:

- KK „Krivaja“ 3.940,20 KM;
- ŽNK „Krivaja“ 4.059,60 KM;
- Streljački klub Zavidovići 1.675,96 KM;
- KK „Krivaja – Bushido“ 937,60 KM;
- KKK „Mladost“ 638,74 KM;
- SRK „Prabellum“ 1.529,46 KM;
- KK „Mersad Kurtalić“ 1.529,46 KM;
- KK „Mersad Kurtalić“ 1.933,80 KM;
- KK „Leopard“ 1.406,40 KM;
- AKK „Duga“ 550,84 KM;
- ŠK „Krivaja“ 357,46 KM;
- BK „Tajan“ 955,18 KM;
- SNIK ATOM 1.454,40 KM;
- GSS - stanica Zavidovići 4.545,00 KM;
- DPFK (Društvo pedagoga fizičke kulture Zavidovići) 2.000,00 KM;
- Savez za sport i rekreaciju invalida općine Zavidovići 500,00 KM;
- Invalidski odbojkaški klub Zavidovići 5.500,00 KM.

Određeni sportski klubovi finansirani su sa zasebnih transfera iz Budžeta Grada Zavidovići, i to:

- Tekući transfer za Nogometni klub izvršen je u iznosu od 87.500,00 KM;
- Tekući transfer za Rukometni klub izvršen je u iznosu od 150.000,00 KM;
- Tekući transfer za Ženski rukometni klub izvršen je u iznosu od 80.000,00 KM;
- Tekući transfer za Odbojkaški klub „Krivaja“ Zavidovići izvršen je u iznosu od 40.000,00 KM.

Za interventnu podršku sportskim manifestacijama Grad Zavidovići pruža podršku kroz realizaciju Tekućeg transfera za sportske manifestacije (Street basket, Vivicitta, malonogometni turniri u MZ i drugo) u iznosu od 5.000,00 KM, za koji se ne raspisuje javni poziv zbog utvrđene namjene na ovom transferu, a isti se realizuje za sufinansiranje navedenih lokalnih sportskih manifestacija i nastupa sportista pojedinaca na domaćim i inostranim reprezentativnim nastupima.

Sredstva se realizuju na osnovu pojedinačnih zahtjeva sportskih klubova, udruženja građana, mjesnih zajednica, sportista pojedinaca, te Gradske uprave uz dostavljen jasno razrađen finasijski plan i program sportske manifestacije.

Iz ovih sredstava mogu se u skladu sa mogućnostima sufinansirati i sportske manifestacije u povodu državnih praznika i značajnih datuma za Grad Zavidovići te kao podrška u organizaciji i provođenju školskih sportskih manifestacija.

U 2023. godini sa navedenog transfera podržane su sljedeće aktivnosti:

Organizacija manifestacije „Izbor sportiste godine Grada Zavidovići“ u iznosu od 3,258,34 KM.

Akademski kajak kanu klub „Duga“ Zavidovići – sufinansiranje troškova sportske manifestacije „Zavidovići open 2023“ u iznosu od 300,00 KM.

Mjesna zajednica „Vožuća“ - memorijalni malonogometni turnir „Imamović Remzo“ u iznosu od 500,00 KM.

Mjesna zajednica „Pašin Konak“ - Malonogometni turnir u Livadama u iznosu od 400,00 KM.

Mjesna zajednica „Brezik“ - Memorijalni malonogometni turnir „Senad Muratović“ u iznosu od 500,00 KM.

Mjesna zajednica „Branioci grada“ - malonogometni turnir „Ridžali – Džebe“ u iznosu od 500,00 KM.

Sa Tekuće budžetske rezerve u 2023. godini također su sufinansirane sportske manifestacije i aktivnosti:

Akademski kajak kanu klub „Duga“ - finansiranje nastupa na balkanskom klupskom prvenstvu u gradu Veles S. Makedonija u iznosu od 2.000,00 KM.

Ženski rukometni klub „Krivaja“ - Organizovanje 2. kola EHF Europa CUP protiv Azerijol iz Azerbejdžana u iznosu 20.000,00 KM.

Invalidski odbojkaški klub „Zavidovići“ – Za vanredne neodgodive troškove sportskih aktivnosti u iznosu od 1.000,00 KM.

Berin Ljakić – Sufinansiranje odlaska na Evropsko prvenstvo u kik boks u iznosu od 500,00 KM.

U 2024. godini Transfer za sportske manifestacije je realizovan u skladu sa Programom utroška sredstava planiranih u Budžetu Grada Zavidovići za 2024. godinu Službe za upravu društvenih djelatnosti, pitanja boraca i opću uprava Grada Zavidovići, broj: 02-11-106/25-AP-2 od 13.01.2025. godine na način kao u 2023. godini.

Napominjemo da je utrošak sredstava za sport i sportske manifestacije bio predmet izvršene revizije finasijskog poslovanja Grada Zavidovići, na šta nije bilo primjedbi od strane revizora.

6. VIJEĆNIČKA PITANJA VIJEĆNIKA DEMIRA BULJUBAŠIĆA

1. Vijećnik Buljubašić Demir: Poštovana Gradonačelnice sa saradnicima, radno Predsjedništvo, kolegice i kolege Vijećnici, sredstva informisanja i Građani Grada Zavidovići, sve vas srdačno selamim i pozdravljam. Ja imam nekoliko vijećničkih pitanja. Interesuje me putni pravac, ulaz u Pašin konak, odnosno naseljeno mjesto Mećevići. Nalazi se u lošem stanju, ogromne rupe na toj dionici predstavljaju ozbiljan problem za sigurno kretanje vozila i svakodnevni život građana. Interesuje me sljedeće:

1. Da li je Gradska uprava upoznata sa ovim problemom? Da li postoji plan za sanaciju ovog putnog pravca? Kada građani mogu očekivati konkretne radove na rješavanju ovog problema? Dok se ne poduzmu konkretni radovi da li se može poslati nasip kako bi se privremeno sanirale rupe?

Odgovor na prvo vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-30/25 od 15.01.2025. godine): Grad Zavidovići je pribavio projektnu dokumentaciju za sanaciju klizišta na lokalnoj cesti Zavidovići - Pašin Konak u naseljenom mjestu Mećeveći. Projektantski predračun sanacije navedenog klizišta iznosi 567.813,00 KM.

Grad Zavidovići trenutno ne raspolaže potrebnim finansijskim sredstvima.

U narednom periodu pokušat će se pronaći rješenje za sufinansiranje projekta.

Do konačnog rješavanja ovog problema povremeno se vrši nasipanje i ravnanje ove dionice lokalne ceste.

2. Vijećnik Buljubašić Demir: 2. Sljedeće pitanje se odnosi na sanaciju putnog pravca Sinanovići - Mahoje. Da li je planirana sanacija ovog dijela puta, ako jeste koji su planirani radovi?

Odgovor na drugo vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-30/25 od 15.01.2025. godine): Aktuelnim Planom kapitalnih investicija Grada Zavidovići revidiranim za period 2024. – 2028. godina planirana je sanacija lokalne ceste Gostović – Žioke - Mahoje u iznosu od 100.000,00 KM. U toku 2025. godine, u skladu sa finansijskim mogućnostima planirat će se radovi na kritičnim dionicama ove lokalne ceste. Vrsta i obim radova za koje će se opredijeliti nadležna služba ovisit će isključivo od visine raspoloživih finansijskih sredstava.

3. Vijećnik Buljubašić Demir: 3. Na sjednici održanoj 31.05.2023. godine podnio sam inicijativu za izgradnju puta u naseljenom mjestu Borovnica. Planom kapitalnih investicija predvidjeli smo izgradnju 1300 metara puta. Interesuje me da li će se inicijativa realizovati, te da li se može kazati okviran vremenski period? Hvala.

Odgovor na treće vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-30/25 od 15.01.2025. godine): Prema aktuelnom Planu kapitalnih investicija Grada Zavidovići revidiranim za period 2024. – 2028. godina, projekat „Asfaltiranje puta Gornja Borovnica“ nalazi se na listi projekata nerazvrstanih cesta i rangiran je kao 13. projekat.

Vremenski okvir kao i stepen realizacije projekta zavisit će isključivo od visine raspoloživih sredstava.

7. VIJEĆNIČKO PITANJE VIJEĆNIKA ZAHIDA AVDIČEVIĆA

Vijećnik Zahid Avdičević: Gospođo Gradonačelnice, radno Predsjedništvo, kolegice i kolege Vijećnici, Građani Grada Zavidovići sve vas srdačno selamim i pozdravljam. Moje pitanje će biti veoma kratko, evo svjedoci smo ovih padavina, moje pitanje se odnosi na nadležnu službu Civilne zaštite. Koliko je sjednica u ovim teškim trenucima održala i koje je zaključke donijela i na osnovu čega će se, evo broj neformalnih razgovora i sa Gradonačelnicom, sa ljudima iz Civilne zaštite.

Na koji način će se vršiti refundacija troškova ljudi koji su na seoskim područjima svojim sredstvima vršili čišćenje snijega? Samo na koji način, toliko i zahvaljujem.

Odgovor na vijećničko pitanje (Odgovor je sačinjen na osnovu akta Službe za upravu civilne zaštite, broj: 07-45-21-37/25 od 03.02.2025. godine): Gradski štab civilne zaštite je do

26.12.2024. godine održao dvije sjednice, te je donesen zaključak da savjeti mjesnih zajednica koji organizuju čišćenje snijega na području svoje mjesne zajednice u saradnji sa civilnom zaštitom obezbijede prohodnost glavnih nekategorisanih puteve u mjesnim zajednicama. Refundacija troškove će se vršiti samo prema Savjetima mjesnih zajednica koji su organizovali čišćenje snijega, i to nakon dostavljanja traženih podataka.

S poštovanjem

Dostavljeno:

GRADONAČELNICA

1. Naslovu,
2. U spis.

mr. iur. Erna Merdić Smailhodžić

Akt pripremio: _____
(Nermin Čahtarević)